


夫那  
撰述

愚菴及禪師語錄  
一卷之五



C40  
4514  
(184)



C 40-4514

了翁上座請大巖及有  
家書置武州紫雲山  
我微矣培院垣府中永  
為學者不敢許出院內  
當山二世鐵牛機謹誌



B 64853

徑山愚菴禪師四會語序

翰林院大學士承旨嘉議大夫金華宋濂撰

或問于濂曰世間至大者何物也曰天與地也曰至  
明者又何物也曰日與月也曰然則佛法亦明且大  
也其與天地日月並乎曰非然也曰其義何居曰天  
地日月寓乎形者也形則有成壞有限量雖百億妙  
高山中涵百億兩曜百億四天下以至于恒河沙數  
皆有窟也皆有止也此無他固乎物者也若如來大  
法則不然既無體段又無方所吾不能成孰能為之  
壞吾不能後孰能為之先吾不能下孰能為之芒



乎忽乎曠乎漠乎微妙而圓通乎其小無內其大無外真如獨露無非道者所以超乎天地之外出乎日月之上大而至干不可象斯爲大矣明而至于不可名斯爲明矣是故以有情言之則四聖以至六凡或覺或迷佛法無乎不具也以無情言之則火水土石與彼艸木或洪或纖佛法無乎不在也三乘十二分教不能盡宣也八萬四千塵勞門不能染汙也嗚呼罄徂徠之松以爲煤斷淇園之竹以爲管其能盡贊頌之美乎然而佛法固明且大也其靈明之在人者萬劫雖遠不離當念一念不立卽證菩提亦在夫自

勉之而已濂雖不敏每遇學佛者喜談而樂道之初不以其證入淺深而有問其意頗有見于斯也徑山住持以中禪師名智及學徒尊之號曰愚菴俗姓顧世居姑蘇得法于元叟端公歷住隆教普慈二刹帝師錫以明辨正宗廣慧禪師之號已而陞淨慈遂主今山四據高座敷揚佛法以聳人天龍鬼之聽緇素相從如雲歸岫其弟子某會萃成書介吾友用堂榎公請文以題其首濂懸燈而疾讀之其解人膠纏如鷹脫條鏃摩雲而奮飛也其方便爲人如慈母愛子一步而三顧也其宏機妙用如大將臨陣旗鼓動而

撰述  
矢石集也誠一代之宗師而有德有言者歎雖不二  
門中一法不存何況於言覽者當求禪師言外之意  
使意見兩忘而忘忘亦忘方近道矣嗚呼佛法超乎  
天地之外出乎日月之上豈細故哉人患不求之耳  
今極其贊頌而書於此錄之端實欲起人之敬信也  
繪畫虛空非愚則惑濂蓋無以迓其責矣

愚菴及禪師語錄

總目

第一卷

隆教禪寺語錄

二十條

第二卷

普慈禪寺語錄

二十九條

第三卷

杭州淨慈報恩禪寺語錄

三十四條

第四卷

徑山興聖萬壽禪寺語錄

十一條

撰述

愚菴及禪師語錄總目

第五卷

再住徑山興聖萬壽禪寺語錄 五十九條

第六卷

小叅 一十三條

第七卷

頌古 五十五首

讚語 三十五首

第八卷

偈頌 三十三首  
長短句

第九卷

偈頌 一百七首  
五七言

第十卷

自題 五首

書跋 十二首

附

塔銘 宋濂撰

愚菴及禪師語錄總目終

支那

愚菴及禪師語錄總目

撰述

愚菴及禪師語錄卷之一

三

愚菴及禪師語錄卷之一

卷之二

卷之三

卷之四

卷之五


卷之六

愚菴及禪師語錄卷之一

門人

編次


隆教禪寺語錄



愚菴及禪師語錄卷之一

170 1 2 3 4 5 6 7 8 9 180 1 2 3 4 5 6 7 8 9 180 1 2 3 4 5 6 7 8 9

支那



門人

離天

不開則不問和尚爲國開堂皇恩佛恩憑何報答師  
云有眼者見有耳者聞僧禮拜師乃云海日高明海  
天空濶峰巒海湧樓閣天開頭頭無上妙門在在金  
剛正體諸佛出世以訛傳訛祖師西來將錯就錯一  
大藏教誑誑問問明眼衲僧自救不了但能無心於  
事無事於心便見堯風蕩蕩舜日熙熙天清地寧民  
康物阜山僧道薄人微遠承院命三江九堰航海梯

支那

支那

二

山爲國開堂舉揚宗旨無一絲毫瞞諸人諸人亦無一絲毫瞞山僧冀各存誠共相委悉

復舉僧問百丈如何是奇特事丈云獨坐大雄峰僧禮拜丈便打師云大小百丈只好無佛處稱尊今日忽有問新隆教如何是奇特事但對他道汝等皆當作佛他若禮拜更向道但辦肯心必不相賺

上堂卽心卽佛兔馬有角非心非佛牛羊無角會麼功德天黑暗女有智主人二俱不受下座

上堂師召大眾衆皆仰視師云鶻子過新羅便下座上堂舉臨濟道一人論劫在途中不離家舍一人論

劫在家舍不離途中那箇合受人天供養臨濟見處偏枯果然只具一隻眼山僧昨抵昌國訪諸官寮從東過西從西過東波波挈挈竟日只在途中且如何說箇不離家舍此日歸來山門頭合掌佛殿裏燒香穿僧堂入廚庫總是自家屋舍又如何說箇不離途中衲僧家只要據實而論若不據實而論謂之脫空謾語漢爭受人天供養隆教與麼告報也是小脫空且平實一句作麼生道乃云從來不唱脫空歌把火燒山拾田螺白格樹頭魚扇子急水灘頭鳥作窠好大哥以拂子擊禪床下座



寶陀古鼎和尚至上堂僧問興化見同叅打下法堂  
意旨如何師云有甚共語處進云高亭訪德山隔江  
見刹竿便回去又作麼生師云蟻子不食鐵進云寶  
陀和尚今日入山相看和尚如何施設師云相逢自  
有知音知何必清風動天地僧禮拜師云敗將不斬  
乃舉龍牙道雲居師兄得第二句我得第一句師云  
大小龍牙只知開張大口不覺舌頭拖地山僧茲承  
寶陀法兄和尚曲勞象駕枉賁空山但愧荒疎無伸  
供養豈敢妄通消息觀音菩薩將錢買糊餅放下手  
却是饅頭是第二句且如何是第一句喝一喝下座

上堂彌勒真彌勒分身千百億時時示時人時人皆  
不識慈氏如來三百六十骨節八萬四千毛竅一時  
撒向諸人懷裏了也敢問諸人還識得也未若也識  
得天上無彌勒地下無彌勒卓拄杖云此時若不究  
根源直待當來問彌勒

上堂僧問語是謗默是誑語默向上有事在如何是  
向上事師云胡孫上樹尾連顛進云向上一路千聖  
不傳向上一路千聖不然畢竟如何則是師云向上  
一路只在目前乃云冬至月頭賣被買牛冬至月尾  
賣牛買被期三百六旬有六日以閏月定四時成歲

移易一絲毫不得東頭賣貴西頭賣賤三十年後破草鞋向甚處著

上堂寒暑迭相催今朝臘月旦滴水一滴凍莫道且緩緩便下座

靈隱天童侍者至上堂舉玄沙因光侍者道師叔若叅得禪小姪當打鐵船下海去沙住後令人持書問光云打得鐵船也未光無對後汾陽昭代云只見錐頭利不見鑿頭方玄覺云玄沙也是貧兒思舊債師云大小玄沙光侍者人我未忘互揚家醜千載之下遭人點檢翠屏終不學他古人一切只是如常昨承

靈隱天童侍者相訪寒溫纔罷燒香喫茶茶罷送歸客位自然主賓道合叔姪情忘今日陞堂略此敘陳伏希道照

佛成道上堂舉趙州問南泉如何是道泉云平常心是道州云還假趣向否泉云擬向卽乖州云不擬爭知是道泉云道不屬知不屬不知知是妄覺不知是無記若真達不疑之道廓然蕩豁如太虛空豈可強是非耶師云王老師過犯彌天將釋迦世尊六年雪山千苦萬辛所得無上大道等閒花擘殆盡合與二十拄杖當時趙州眼光燦破四天下面被熱瞞則且

置今日衆中莫有爲世尊拔本底麼如無隆教不是  
爲他閒事長無明忝爲遺教遠孫未免出隻手去也  
拽拄杖下座一時趨散

真泯二上座火真如淨境界一泯未嘗存能隨捺淨  
緣遂成十法界擲火云泥捏金剛水底走筆描菩薩  
火中行

上堂舉東山演祖示衆云祖師說不著佛眼看不見  
四面老婆心爲君通一線便下座師云若教頻下淚  
滄海也須乾

上堂僧問不與萬法爲侶者是甚麼人師云十字街

頭石敢當僧擬再問師云又要第二杓惡水在乃云  
時維三月節屆清明不寒不煖半陰半晴落花啼鳥  
一聲聲鷲拈拄杖云穿却解空鼻孔戳瞎達磨眼睛  
踏破草鞋赤脚走好山猶在最高層

師一日盥手次僧問如何是祖師西來意師以水灑  
之僧便走師喚來來古人水潑挺逐不去汝因甚便  
走僧却以手作灑水勢師云汝作道理會也僧便喝  
師亦喝僧復喝師便打僧云和尚莫錯打某甲師云  
汝但喫棒我要者話行

上堂舉古者道色聲爲無生之鴆毒受想是至人之

坑窞又道直須向聲色裏睡眠聲色裏坐臥擊拂子  
云喚作聲得麼豎拂子云喚作色得麼離却分別心  
識意度言句外道將一句來

佛誕上堂良久云釋迦老子生也蝦蟆蚯蚓同證法  
身露柱燈籠共相慶賀雲門大師道我當時若見一  
棒打殺與狗子喫成人者少敗人者多擊拂子下座  
上堂水母目蝦瑣蝓腹蟹眼在鼻上脚在肚下下座  
元太初藏主至上堂舉阿難尊者問大迦葉云世尊  
傳金欄外別傳何物迦葉召阿難阿難應諾迦葉云  
倒却門前刹竿著師云阿難如是問迦葉如是答且

道世尊當時有所傳耶無所傳耶這裏著得隻眼一  
大藏教五千四十八卷半滿偏圓權實空有無不透  
頂透底拈拄杖卓一下云打麪還他州土麥唱歌須  
是帝鄉人

上堂顧大眾云老僧已爲諸人和盤托出了也飢逢  
王饍不能餐莫錯恠人好便下座

上堂僧問馬祖陞堂百丈卷席意旨如何師云不是  
苦心人不知進云龍袖拂開全體現象王行處絕狐  
踪還得相應也未師云萬里望崖州乃舉洞山道五  
臺山上雲蒸飯佛殿階前狗尿天刹竿頭上煎餛子

撰述  
三箇胡孫夜播錢石霜道風吹石臼爭哮吼泥捏金剛水底走踏翻海月亂波生驚起土星犯南斗道吾道三面狸奴脚踏月兩頭白牯手拏煙戴冠碧兔立庭柏脫殼烏龜飛上天保寧勇和尚云此三頌一頌堪爲佛祖爲師一頌堪作人天榜樣一頌堪驗衲僧眼目具眼者辨取師云保寧與麼道奴見婢殷勤翠屏不惜眉毛與諸人說破字經三寫烏焉成馬解制謝都寺辦齋藏主秉拂上堂咬破鐵酸筍百味具足演出大藏教一句該通三脚驢子弄蹄行萬里無寸草下座

秋日示衆叨據名藍海上州慙無道福繼芳猷宗綱委地方堪憫聖德如天未易酬好把靈符懸肘後莫將閒事浣心頭金風昨夜飄梧葉地北天南又早秋師一日入園見典座割瓜師問刈得幾箇祖師頭座云三十箇師云那箇皮下有血座云和尚何得重重相戲師云好心不得好報

八月旦開堂請監收并謝雨上堂今朝八月初一天外雲收日出夜來灌門龍王見大神變降注大雨盡大地艸木叢林稻禾菽粟皆得霑濟隆敎寺裏普請監收箇箇得人一年三百六十日管取粥足飯足江

南兩浙春寒秋熱下座

育王石室和尚遺書至并入祖堂上堂五十二年弄巧成拙踏破虛空赤脚行萬象森羅笑不徹大衆箇是育王石室和尚未後爲人底句子明如杲日寬若太虛權實照用俱備擒縱殺活皆全可以津濟四生可以梯航九有蚊子上鐵牛無你插嘴處卓拄杖云這裏見得無一處不睹慈容無一時不聞說法苟或未然少間下座普請諷經莊嚴品位香煙起處一任觀瞻

師到千朶莊衆請觀海次師問大海不宿死尸魚以

水爲命因<sub>二</sub>世死在海中代云怕爛却那又云性海無風金波自<sub>一</sub>湧忽遇旋嵐偃嶽時如何代云湛湛地回至莊中喫茶次師云邪心是海水煩惱是波浪毒害是惡龍塵勞是魚鱉諸人日用現行作麼生免得有僧拈茶銚師前傾茶便行師云正是亂瀉僧回顧師便喝出

九日上堂僧問如何是賓中賓師云君向瀟湘我向秦進云如何是賓中主師云常在途中不離家舍進云如何是主中賓師云常在家舍不離途中進云如何是主中主師云橫按鎊耶全正令太平寰宇斬癡

頑進云賓主已蒙師指示向上宗乘事若何師云三年一闕九日重陽復舉大茅示衆云欲識諸佛心但向衆生心行中識取欲識常住不遷義但向萬物凋落處會取師云古人言不虛發發必全真衆生現行無明煩惱業識茫茫作麼生說箇諸佛心秋變冬凋春生夏長萬物榮謝無有停息又如何說箇不遷義三玄一要事難分得意忘言道易親一句明明該萬象重陽九日菊花新拍禪床云汾陽和尚來也切忌錯下註脚

上堂顧左右云千年田八百主郎當屋舍没人修火

官頭上風車子咄卷之二

上堂二月仲春漸暄村村花柳爭妍唯有衲僧拄杖長時無變無遷卓拄杖云上乘菩薩信無疑中下聞之必生怪

二二年比丘法藏助銀壹兩  
慧慶寺比丘照中助銀壹兩刻

愚菴及禪師語錄第一卷

佛弟子王大毅助寫費 松陵非仲張傳封

長四金之龍書

崇禎二年己巳歲佛歡喜日姑蘇免率圍 識

愚菴及禪師語錄卷之一





時時節因緣則不問四衆臨筵願聞法要師云山僧  
剃頭五日一次進云和尚與麼答話莫不得麼師云  
好人不肯做直要屎裏臥進云三聖道我逢人則出  
出則不爲人意旨如何師云枯桑知天風進云興化  
道我逢人則不出出則便爲人又作麼生師云海水  
知天寒進云和尚今日逢人則出出則爲人豈不出  
他古人一頭地師云莫亂統進云世尊出世梵王前  
引帝釋後隨和尚爲甚麼不許學人讚歎一句師云  
向汝道莫亂統僧禮拜歸衆師乃云道業無成愧昔  
賢行藏去住謾隨緣自憐宿債難逃避又向滄溟駕

鐵船其奈大法陵遲時當象季新長老用盡神通又  
且如何施設敢請文殊普賢爲普慈打篙搖櫓勢至  
觀音張帆把柂見前勝流交相唱和但能同德同心  
自然無可不可不住此岸不住彼岸不住中流直教  
盡十方塵毛刹海愚癡下劣貪苦疲乏穢惡不淨衆  
生任運流入薩婆若海爲依爲怙正與麼時且風恬  
浪靜共樂清平一句又作麼生道豎拂子云天高羣  
象正海闊百川朝  
上堂拈拄杖云十地驚心二乘罔測卓拄杖云子承  
父業賺殺多少人靠拄杖下座

上堂舉雲門道若說菩提涅槃真如解脫是燒楓香  
供養你若說佛說祖是燒黃熟香供養你若說超佛  
越祖之談是燒餅香供養你皈依佛法僧下去師云  
雲門氣宇如王却作座主見解普慈道若說菩提涅  
槃真如解脫是將黑豆換你眼睛若說佛說祖是將  
木楔子換你眼睛若說超佛越祖之談是將魚目換  
你眼睛皈依佛法僧下去

上堂僧問衆生爲解礙菩薩未離覺和尚作麼生師  
云天寒日短兩人共一椀進云如何是清淨法身師  
云月色和雲白松聲帶雨寒乃云時節不相饒人逢  
臘月旦昨日地搖六震今朝天雨四花你諸人只管  
瞋睡冬行春令則不問面南看北斗一句作麼商量  
上堂僧問藥山示衆云我有一句子待特牛生兒卽  
向汝道未審是那一句師云千手大悲提不起進云  
時有僧出云特牛生兒也只是和尚不道山喚侍者  
將燈來僧便抽身歸衆意旨如何師云一對鴛鴦畫  
不成乃云今朝正月十五開却千門萬戶斬新舊日  
風規掃蕩陳年露布良久云春暖画堂多富貴夜深  
燈月兩相宜

上堂僧問釋迦已滅彌勒未生正當今日佛法委付

何人師云老僧打退鼓進云前無釋迦後無彌勒還  
有叅學分也無師云風不來樹不動乃云目前無法  
心外無機皇風蕩蕩民物熙熙花霏霏日遲遲高下  
林巒錦繡園却惟常時杜鵑子春山無限好猶道不  
如歸

燈都寺火舉火把云漏燈箴子照破歷劫生死昏衢  
盡十方世界是箇大涅槃門顧左右云夜來何處火  
燒出古人墳

一日新到僧叅師問甚處來僧云補陀禮拜觀音來  
師云觀音菩薩將錢買胡餅放下手却是饅頭作麼  
生會僧云學人乍入叢林乞和尚慈悲指示師募拈  
拄杖云東海鯉魚打一棒雨似盆傾會麼僧擬進語  
師便打云若到諸方不得錯舉

祈雨看經上堂舉睦州看華嚴經次有僧問是甚麼  
經州云大光明雲青色光明雲紫色光明雲那邊是  
甚麼雲僧云南邊是黑雲州云今日定有雨師云睦  
州將錯就錯瞞這僧則易瞞普慈則難山門今日看  
經設有僧問是甚麼經只向道扇子踣跳上三十三  
天築著帝釋鼻孔東海鯉魚打一棒雨似盆傾豐年  
野老謳歌甚在處嘉禾合穗生下座

上堂趙州道箇洗鉢去其僧豁尔知歸鳥窠吹起布  
毛侍者當下得一呵呵囉囉哩達磨老臊胡打落  
當門齒

上堂舉南泉示衆云自小牧一頭水牯牛擬向溪東  
放不免食他國王水草擬向溪西放不免食他國王  
水草不如隨處納些些總不見得有僧舉似雲門門  
云南泉水牯牛隨處納些些且道在牛內納牛外納  
直饒說得納處分明我更問你索牛在師云王老師  
道十八上便解作活計只箇水牯牛也不解牧得累  
他雲門騎牛覓牛普慈這裏自小牧一頭水牯牛不  
免食他國王水草只是不曾犯人苗稼有時牽犁拽  
杷有時臥月眠雲飢則加餐渴則就飲數十年來但  
恁麼過且道與南泉相去多少召衆云千頭萬頭但  
識取一頭

上堂廣尋文義鏡裏求形息念觀空斬頭覓活揔不  
與麼無孔鐵錘劃拄杖云三邊不用安戈甲萬里歌  
謠賀太平

普請栽松上堂僧問記得臨濟在黃檗栽松次檗云  
深山裏栽許多松作什麼濟云一與山門作境致二  
與後人作標榜道了以鑿打地三下意旨如何師云

今日普請栽松進云可謂峻硬不得問著師云少神作麼進云黃檗道雖然如是子已喫吾三十棒了也不知臨濟當時過在什麼處師云你道臨濟合喫棒不合喫棒進云喫棒且置濟以鐶打地三下作噓噓聲畢竟明什麼邊事師云明鐶頭邊事進云黃檗道吾宗到汝大興于世還端的也無師云一句合頭語萬劫繫驢橛僧禮拜而退師復舉前案云諸人要做臨濟兒孫則且置只如黃檗道雖然如是子已喫吾三十棒了也且道臨濟當時過在什麼處應菴云養子之緣固當如是扶強不扶弱濟以鐶打地三下復

作噓噓聲爲是啐咏同時 爲復別有道理普慈向這裏擬著筒眼也要諸人瞥地卓拄杖云雪後始知松柏操事難方見丈夫心

出莊歸請知客上堂昨日過南莊今朝又東郭動靜與去來何曾有間隔然則動則涉塵勞之境靜則沉昏醉之鄉動靜雙泯則落空亡動靜雙行則瞞預佛性七十三八十四途路之樂不如在家喝一喝云誰在畫樓沽酒處相邀來喫趙州茶  
上堂山田脫粟飯野菜澹黃蔬喫則從君喫不喫任東西知恩者少負恩者多

上堂僧問佛法禪道相去多少師舉手云展則成掌握則成拳僧禮拜師云狂狗趁塊乃舉保寧勇和尚示衆云風鳴條雨破塊曉來枕上鶯聲碎蝦蟇蚯蚓一時鳴妙德空生都不會都不會三箇成羣四箇作隊宵宵窈窕飄飄搖搖向前村後村折得梨花李花一佩兩佩師云右軍筆畫入石三分李杜文章光燄萬丈老保寧可謂盡善盡美點檢將來未免咲破衲僧鼻孔何故要且無佛法道理普慈又作麼生乃云蒲團上端坐針眼裏穿線西風一陣來落葉兩三片上堂道遠乎哉觸事而真聖遠乎哉體之卽神雲門

乾矢橛洞山麻三斤罕逢穿耳客多遇刻舟人

上堂舉僧問乾峰十方薄伽梵一路涅槃門未審路頭在什麼處峰拈拄杖劃一劃云在這裏雲門拈起扇子云扇子踣跳上三十三天築著帝釋鼻孔東海鯉魚打一棒雨似盆傾師云涅槃心易曉差別智難明乾峰雲門雖則各資一路瞞者僧卽得點檢將來等是行於邪道普慈今日設有僧問十方薄伽梵一路涅槃門未審路頭在什麼處只向道家家門首透長安

解夏進退兩序上堂有進有退有結有解左之右之

風流儒雅鐘樓上念讚床脚下種菜勝首座道猛扈  
當路坐卓拄杖云一雨普滋三艸二木

上堂凡夫實謂之有二乘析謂之無緣覺謂之幻有  
菩薩當體卽空雲門道衲僧見拄杖但喚作拄杖行  
但行坐但坐總不得動著師云一切賢聖皆以無爲  
法而有差別便下座

中秋謝開田耆舊上堂僧問百丈示衆云汝爲我開  
田了我爲汝說大義有僧開田了便問開田了也請  
和尚說大義丈展開兩手且道是說不說師云一舉  
四十九進云恁麼則天人羣生類皆承此恩力師云

汝分上作麼生進云和尚今日開田功昭百世學人  
請和尚說大義畢竟如何展演師云爛泥裏有刺僧  
禮拜師乃云百丈開田說大義大舒兩手龍峰開田  
謝主事豈可空然擊拂子云一片月生海幾家人上  
樓

上堂世尊三昧迦葉不知迦葉三昧阿難不知阿難  
三昧商那和脩不知普慈三昧諸人不知諸人三昧  
各各不知所以道譬如河中水川流競奔逝各各不  
相知諸法亦如是又如大火聚猛焰同時發各各不  
相知諸法亦如是喝一喝將謂合有與麼說話

撰述  
上堂僧問竺土大仙心東西密相付如何是密付底  
心師云九秋黃葉亂飄金進云和尚莫將境示人師  
云老僧罪過乃云暫時歛念是處是彌勒無門無善  
財分爾有心土石山河瓦礫荆棘不是神通妙用亦  
非法爾如然萬象之中獨露身唯人自肯乃方親昔  
年謬向途中覓今日看成火裏冰喝一喝下座

上堂舉藥山久不上堂院主白云大衆久思和尚示  
誨山云打鐘著主聲鐘衆集山便歸方丈主隨後云  
和尚許爲衆說法因甚一言不措山云經有經師論  
有論師又爭恠得老僧師云藥山老漢當斷不斷反

招其亂當時待他道大衆久思和尚示誨拽拄杖劈  
脊便棒非徒截斷這僧舌頭要且不失爲天下宗匠  
請首座都監寺并謝監收上堂舉五祖和尚道四五  
百石麥二三千石稻好箇休糧方耆婆不得妙五祖  
老人等閒拈出無上命世真丹拋向諸人面前一任  
橫吞豎嚙可以起死回生可以轉凡成聖若不具人  
天眼目直是無下口處何故明明百草頭邊事不比  
揚岐粟棘蓬

祖忌拈香對梁王廓然無聖此地無金二兩坐少林  
九年面壁俗人沽酒三升無影樹花敷五葉無煙火



煥續千燈太平本是將軍建不許將軍見太平

上堂舉教中道假使滿世間皆如舍利弗儘思共度  
量亦復不能知鷲拈拄杖云釋迦老子與天帝釋向  
中庭裏相爭佛法甚闊各與二十拄杖貶向二鐵圍  
山卓拄杖云好把一枝無孔笛夜深吹過汨羅灣

因雪上堂僧問雪覆千山爲甚麼孤峰不白師云別  
是一乾坤進云九天垂瑞雪萬國盡懽心師云片片  
不落別處僧禮拜鷲拈拄杖卓一卓云乾坤大地一  
時粉碎了也十方諸佛六代祖師天下老和尚直得  
瓦解冰消獨有普賢菩薩具大神力見大神變歡喜

踴躍喃喃說偈云雪子落紛紛烏盆變白盆忽然日  
頭出依舊是烏盆忽有箇漢出來道長老長老此是  
雪詩衲僧分上合作麼生只向道三冬多瑞雪鼓腹  
樂堯年

涅槃上堂衆生畢竟無生死諸佛何曾有涅槃一把  
柳絲收不得和煙搭在玉欄干

上堂僧問擬心卽差動念卽乖不擬不動還有過也  
無師云有進云畢竟如何則是師云莫認自己清淨  
法身乃云時節不相饒又逢三月旦拈却佛祖機與  
君通一線棕櫚葉散夜叉頭芍藥花開菩薩面

撰述  
上堂舉德山和尚因僧問從上諸聖以何法示人山云我宗無語句亦無一法與人雪峰從此有省有問雪峰和尚見德山得箇什麼便休去峰云我當時空手去空手回東山演祖拈云白雲今日說一透未過者有兩箇人從東京來問他道甚處來他却道蘇州來便問伊蘇州事如何他道一切尋常雖然如是嘯白雲不過何故只爲語音不同畢竟如何蘇州菱邵伯鶉師云老東山可謂長於譬喻詞不迫切雖然如是要且只說得德山雪峰影子邊事若是齊眉共矚竝駕齊驅未敢相許何故閩蜀同風肚裏有蟲

結夏上堂護生須是殺殺並始安居是真實語是不誑語喝一喝云差之毫釐診以千里

上堂顧左右云彼自無瘡勿傷之也歸堂喫茶去上堂臨濟喫六十拄杖高安灘卜知歸興化於大覺棒頭深明黃檗意旨這般說話諸方喚作殘羹餽飯然羹藜含糗者難與道太宰之滋味是汝諸人合作麼生不覺秋深夜又長

重陽上堂舉真淨和尚云九日無白醪飽餐黃粟糕十日有黃菊催人打禾穀五更鐘未鳴鄰雞已數聲相逢不下馬各自奔前程師云逸格風流通身文采

老雲菴美則美矣若約衲僧分上猶欠勦絕在山僧  
效顰亦有一偈舉似大衆非圖邁古超今且要應時  
應節九日無白醪萸茶滿椀澆十日有黃菊涼颺動  
林麓五更鐘未鳴過鴈兩三聲更欲求玄旨迢迢十  
萬程

上堂金佛不度爐木佛不度八泥佛不度水真佛屋  
裏坐趙州眼光燦破四天下小免錯認驢鞍橋作阿  
爺下領畢竟如何覓佛不見討祖不見祖甜瓜徹  
蒂甜苦瓠連根苦

上堂譬如牛過窻櫺頭角四脚都過了唯有尾巴過  
不得且道諸訛在甚麼處良久虎咬大蟲蛇吞鱉鼻  
上堂舉趙州和尚道老僧除二時上堂粥飯是雜用  
心處師云趙州有年無德錯下名言燒香禮拜是雜  
用心看經講教是雜用心參禪學道是雜用心了生  
達死是雜用心成佛作祖是雜用心唯二時上堂粥  
飯是善用心何也不曾咬破一粒米

上堂僧問如何是毗盧師師云斷根草鞋進云如何  
是法身主師云尖簷席帽進云學人不會師云見成  
行貨有什麼不會僧擬議師使喝乃云春雨如膏春  
風如刀春光似箭斷不相饒卓拄杖云龍峰拄杖無

撰述  
遷變又見馘黃上柳條

上堂知見立知卽無明本知見無見斯卽涅槃無明涅槃是一是二一夜落花雨滿城流水香

上堂十五日已前覓甚文殊普賢十五日已後釋迦老子不知有正當十五日天上無彌勒地下無彌勒時有僧躍出問天上無彌勒地下無彌勒未審誰與安名師云我行荒艸裏汝又入深村

解夏上堂四月十五日結却布袋頭十字縱橫底有甚數七月十五日解却布袋頭無繩自縛底有甚數喝一喝結也不可得解亦何曾有解結二圓離面南

看北斗下座

上堂僧問至道無難唯嫌揀擇不揀擇時如何師云  
遇飯卽飯遇茶卽茶僧禮拜師云放汝三十棒乃云  
纔逢解夏又見中秋看看白盡少年頭幕拈拄杖旋  
嵐偃嶽而常靜江河競注而不流野馬飄鼓而不動  
日月歷天而不周卓拄杖有時乘好月不覺過滄洲

古杭真珠寺比丘大成助銀壹兩  
靈瑞園比丘弘徽助銀壹兩

刻

愚菴及禪師語錄第二卷

松陵非仲張馬對

辨弟子王大毅助寫贊

自聞道人蔣成榮刊

長洲金之龍書

歡喜日姑蘇苑率園

識

崇禎二年巳

愚菴及禪師語錄卷之二

愚菴及禪師語錄卷之二

門人 正除 編次

杭州路淨慈報恩禪寺語錄

師於至正戊戌七月二十日承行宣政院領院官太尉丞相達識帖穆爾差宣使九曜奴馳驛于蘇州受業海雲院敦請入寺據室云刮龜毛于鐵牛背上朝打三千截兔角於石女罽邊莫打八百指東劃西鼓唇搖舌且居門外擊石火閃電炆冰稜上度過九院劔刃上拾得全身茗帚柄聊與三十總不與麼來時如何拈拄杖云吽吽

指法座云盡十方世界是普光明藏師子之座諸佛  
衆生同起同坐因甚山僧今日特地高陞只恐諸人  
昧其所自便陞座歛衣就坐上竺和尚白惟云法筵  
龍象衆當觀第一義師云若論第一義法筵未啓法  
鼓未鳴山僧未陞座已前薦得早落第二了也設使  
起模畫樣作意商量問一句來答一句去未免落七  
落八今日衆中莫有天然氣槩底麼不妨相見僧問  
保壽開堂三聖推出一僧壽便打意旨如何師云豉  
子上鐵牛進云三聖道怎麼爲人非但瞎却這僧眼  
瞎却鎮州一城人眼去在壽便歸方丈又作麼生師

云鷓子過新羅進云尸如和尚今日開堂相君堅請  
湖海交歡四衆臨筵如何指示師云但把片心窮浩  
劫蕩雲深處祝堯年僧禮拜師乃云皇皇南宕勝覺  
場奕奕永明高窟山僧才疎德薄豈敢躋扳然遇  
緣卽宗難爲辭讓湖光瀲灩山色空濛廓示真如境  
界宗鏡高懸慧日朗耀恢張少室風規一一騰今煥  
古頭頭玉轉珠回直得釋迦彌勒共樂堯年文殊普  
賢同傾舜日雖然如是猶未撥動向上一竅在嗚于  
戈才偃息四海樂昇平師復舉當山智覺禪師示衆  
云欲識永明古門前一湖水日照光明生風吹波浪

起師云諸人還見祖師麼卓拄杖云要識是非面目  
見在

開堂閱藏經一室終日看經經頭一字因甚不識常  
年喫飯千粒再粒從一粒生因甚不知卓拄杖云打  
破兩重關泗洲人見大聖

上堂天不能蓋地不能載細入無間大絕方所黃連  
甜甘草苦焦螟蟲吞却虎明眼衲僧休莽鹵

謝齋秉拂上堂舉五祖和尚示衆云結夏無可管顧  
諸人未免作一家宴遂擡手云邏囉招邏囉搖邏囉  
送莫恠空疎伏惟珍重南屏冬至叢席荒涼直是無

可施設賴有庫司都寺與堂中首座前日作那一場  
佛事不同小小離四句絕百非攪酥酪醍醐爲一味  
鎔餅盤釵釧爲一金令我現前一衆三世諸佛歷代  
祖師五百十六大阿羅漢均飽禪悅法喜眼裏也飽  
耳裏也飽不覺手之舞之足之蹈之歡喜踴躍向宗  
鏡光中同聲贊歎云希有希有奇哉奇哉於食等者  
於法亦等於法等者於食亦等山僧只管端坐受供  
養且道與五祖相去多少良久云其施汝者不名福  
田供養汝者墮三惡道

上堂僧問蓮花未出水時如何師云寒則普天普地

撰述  
寒進云出水後如何師云熱則普天普地熱進云如何是佛法大意師云門前一湖水乃云一九二九相喚不出手三九二十七樹頭吹簫篋四九三十六夜眠如露宿時節不相饒朱顏日漸凋你衲僧家寒則向火熱則乘風各自照鏡看面皮厚多少

上堂舉僧問鏡清新年頭還有佛法也無清云有僧云如何是新年頭佛法清云元正啓祚萬物咸新僧云謝師答話清云鏡清今日失利又僧問智門新年頭還有佛法也無門云無僧云年年是好年日日是好日爲什麼却無門云張公喫酒李公醉僧云老老

大大龍頭蛇尾門云智門今日失利師云新年頭有佛法鏡清合喫二十拄杖新年頭無佛法智門合喫二十拄杖何故老老大大不合說有說無喝道無不是無道有不是有東望西耶尼面南看北斗

元宵上堂人人自有光明在看時不見暗昏昏既是自己光明因甚看時不見驀拈拄杖敲燭臺云一燈發千光千光一燈見

佛涅槃上堂湖光激灩晴偏好山色空濛雨亦奇淨法界身無出沒不須惆悵怨芳時

清殿主火琉璃殿上荆棘叅天勝熱門頭清風匝地



擲火云郎當屋舍没人修火官頭上風車子

佛誕上堂僧問淨法界身本無出沒因甚釋迦老子今日降生師云知而故犯進云遵布衲浴佛次藥山問你只浴得這箇還浴得那箇麼遵云把將那箇來如何是那箇師云擔枷過狀又僧問心佛及衆生是三無差別還端的也無師去的進云不是心不是佛不是物是箇甚麼師云不識又僧問佛身無爲不墮諸數因甚有千百億化身師豎拂子云你道這箇是第幾身僧擬進語師便喝僧退後師云身口意清淨是名佛出世身口意不淨是名佛滅度三文錢娶箇

黑老婆頭不梳面不洗知他是凡是聖

一日供羅漢達識帖穆爾丞相到寺問師云長老今日供羅漢五百尊者俱來應供也無師云活佛降臨羅漢安得不至相云施主設齋得何果報師云種穀不生豆相云恁麼則功不浪施也師云賴遇丞相證明相云三輪空寂畢竟如何師云空相云功歸何所師不答相云長老何不答話師云且請方丈喫茶丞相到方丈又問淨名丈室容受三萬二千師子座淨慈丈室容多少師云一塵不立相云得與麼觀體相違師揭起簾云請丞相鑑相呵呵大笑云作家宗

師不勞再勘師便供茶

上堂教中道見見之時見非是見見猶離見見不能及顧左右召大衆云還見麼一等共行山下路眼頭各自看風煙

上堂僧問古人拈椎豎拂意旨如何師豎起拂子進云畢竟意作麼生師云待汝一口吸盡西湖水只向汝道乃云譬如琴瑟箏篴雖有妙音若無妙指終不能發橫按拄杖以手作撫琴勢云發則發了也諸人還聞麼佛以一音演說法衆生隨類各得解不見祖師道幽寒角發孤城十里山頭漸杳冥一種

是聲無限意有堪聽有不堪聽

上堂古德道一處不通兩處失功兩處不通觸途成滯雲門舉了拈起拄杖云山河大地三世諸佛盡在拄杖頭上有甚滯礙一切衆生只被色空明暗隔礙便見有生滅之法師拈起拄杖云拄杖子吞却山河大地色空明暗何處有也生滅之法了不可得諸人每日著衣喫飯行住坐臥有甚麼滯有甚麼礙

上堂僧問真空不壞有真空不壞色作麼生是真空師云山河大地進云治生產業皆與實相不相違背如何是實相師云無明煩惱進云便恁麼去時如何

師云笑破虛空乃云撥草瞻風只圖見性卽今上人性在甚處識得自性方脫生死眼光落地時作麼生脫脫得生死便知去處四大分離向什麼處去大衆不得孤負兜率不得孤負老僧不得孤負自己上堂何物苦求而不得何物不求而自來何物鐵椎打不破何物夜合而晝開滿地落花春已過綠陰空鎖舊莓苔

祖忌拈香雙耳帶金環兩眼如墨突行脚不逢人九年空面壁破邪師六宗異見亂世英雄傳上乘一心之印太平奸賊隻履翩翩何處歸一花五葉成狼籍

顧左右云淨智妙圓體自空寂

嗣隆藏主火宗風欲嗣虎丘隆藏教掀翻氣吐虹二十七年全體現南山燒炭北山紅

千秋節冬至上堂千秋令節今朝是九九陽生第一爻四海陰霾俱解駁宏雲深處祝唐堯

平山林和尚入祖堂召大衆云亭亭石塔東峰上此老初來百神仰福源浩浩起當湖千歲巖頭飛白浪宗鏡高懸二十年不啻焰炷高萬丈翻身靠倒靈鷲峰雙樹悲風撼穹壤撲碎破砂盆滅却正法眼動靜絕行蹤去來無影象是謂眼空佛祖道重王臣年逾

八秩五處住山平山老和尚指牌云湖光瀲灩山空濛靚體全彰大人相

上堂僧問元正啓祚萬物咸新如何是新年頭佛法師云日日香花夜夜燈進云蒲團靜倚無餘事永日寥寥謝太平師云知恩方解報恩乃云元正啓祚須彌椎打虛空鼓萬物咸新普天和氣轉洪鈞恭惟首座大衆藍田美玉丹山鳳各各起居多福永日寥寥謝太平一湖春水當門淥

江浙省丞相達識帖穆爾脩設水陸普度大會陞座拈香云此香毓乾坤之正氣真柱國之長材擢幹舒光匝祥芬于龍樓鳳閣分枝布葉騰瑞藹于柏府薇垣拈來價重連城藹處恩覃沙界奉爲某人虔懇寶爐供養十方常住三寶法界幽顯聖凡平等資熏普皆饒益出生功德祝延今上皇帝聖躬萬歲萬歲萬萬歲陛下欽願政教立而姦邪止八方銷兵革之憂陰陽調而風雨時萬姓樂耕桑之業遂就坐僧問大丞相揮金建會普濟羣生召尊宿據令提綱願聞極唱師云且喜天下太平進云與麼則八方銷兵革之憂萬姓樂耕桑之業師云重言不當吃進云教中道釋迦世尊以一大事因緣故出現于世欲令衆生開

撰述  
示悟入佛之知見莫不便是者箇道理麼師云休將  
鶴唳誤作鸞啼進云大丞相方面東南翊贊中外廣  
修勝會保國安民所獲福德其量幾何師云虛空可  
量風可繫無能盡說佛功德僧禮拜師乃云釋迦世  
尊以一大事因緣故出現于世種種譬喻演說諸法  
欲令衆生開示悟入佛之知見所以道我此法印爲  
欲利益世間故說唯此一事實餘二則非真又道是  
法非思量分別之所能解在所游方勿妄宣傳敢問  
諸人且如何說箇一大事因緣豎拂子云離却拂子  
道得則大丞相修設水陸普度勝會一期事畢山僧

不必高陞此座鼓兩片皮諸人不妨各自散去其或  
未然向第二義門與諸人打葛藤去也良久云譬如  
虛空具含衆象於諸境界無所分別又如虛空普遍  
一切於諸境界平等隨入如天普蓋如地普擎如日  
普照如風普吹不可以智知不可以識識諸佛出世  
以之成等正覺津濟四生梯航九有祖師西來以之  
建法幢立宗旨開甘露門廣度羣品當今聖主以之  
統御金輪調和玉燭九重端拱無爲萬國咸歸至化  
故我大丞相以之方面東南股肱王室拯生民于水  
火保社稷于安危展臯夔稷卨之訏謨樹伊傳召周

撰述  
之大業見前勝流以之治生產業作諸佛事乃至今  
辰結集勝會同音僉誦法華妙典說戒放生熏修懺  
法悉使見聞莫不回三毒爲三聚淨戒轉六識爲六  
波羅蜜回煩惱爲菩提轉無明爲大智以之保國安  
民則國安民泰以之禳災弭盜則盜息災消以之懺  
罪則罪垢蠲除以之薦亾則亾沒解脫以之普度水  
陸會內幽顯聖凡則同駕願輪俱登覺岸可謂理無  
不徧事無不周殊勝中殊勝奇特中奇特如寶月之  
行空了無朕迹如蓮花之出水不滌淤泥喝一喝使  
以此爲一大事因緣切忌錯認驢鞍橋作阿爺下頷

要且未摸著他釋迦老子脚跟下一莖毛在直饒離  
言說相離文字相離心緣相大似癡狂外邊走亦未  
夢見他釋迦老子腋下汗臭氣在擊石火閃電光淨  
倮倮赤洒洒沒可把也是蝦蟇窟裏作活計畢竟如  
何驀拈拄杖釋迦老子穿過諸人鼻孔卓一下云拄  
杖吞却釋迦老子又卓云釋迦老子吞却拄杖舉起  
云喚作拄杖又是釋迦老子喚作釋迦老子又是拄  
杖擲下云拄杖不可得釋迦老子不可得諸人鼻孔  
在什麼處且喚什麼作大事因緣一切智智清淨無  
二無二分無別無斷故遂合掌顧左右云看看十字

街頭石敢當醉中驚覺起來倒騎拱北樓奮身虛空  
歡喜踴躍普告大眾云日煖風和二月天同修勝會  
結良緣黎民永息三災劫聖壽延鴻億萬年喝一喝  
復舉天台智者大師昔居南嶽讀法華經至是真精  
進是名真法供養如來見一會靈山儼然未散敢問  
大眾智者自是陳隋時人與釋迦老子相去二千餘  
載因甚却見一會靈山儼然未散爲復是神通妙用  
法爾如然這裏緇素得出便見大丞相卽今與智者  
大師釋迦老子把手竝行不異靈山一會其或未然  
是真精進是名真法供養如來更須仔細熟讀始得

拍禪床下座

上堂顧視大眾云會麼山門前金剛是泥做便下座  
上堂林泉涼夏日長頭頭顯露物物昭彰雨過六橋  
楊柳暗風來十里芰荷香

上堂今朝五月半舉則舊公案普請諸禪流大家著  
眼看鷲拈拄杖喚作南屏拄杖咲倒五百羅漢

乘提點火十方國土中唯有一乘法劫火洞然世界  
俱壞唯金剛圈不壞莫不便是這箇法麼舉火把云  
道得也是火焰上添草

七月旦請侍者諸山客至上堂一葉落天下秋法身

撰述  
須透鬧啾啾定光金地遙招手智者江陵暗點頭  
喚侍者云三界唯心萬法唯識一句中具三玄一玄  
中具三要且道與上來說話相去多少良久云若也  
不會問取諸山和尚

上堂僧問如何是本身盧舍那師云不離閻梨所問  
進云如何保任師云彼自無瘡勿傷之也乃舉僧問  
安國師如何是本身盧舍那國師云爲老僧過淨瓶  
來僧取淨瓶與師師云却安舊處著僧安舊處又問  
如何是本身盧舍那國師云古佛過去久矣雲門云  
無朕迹師云雲門好箇無朕迹畢竟如何是本身盧

舍那乃云花發雞冠媚早秋誰人能捺紫絲頭有時  
風動頻相倚似向階前鬪不休喝一喝

上堂十方諸佛是箇爛木樛三賢十聖是箇茅溷頭  
籌子汝等諸人揔來者裏作麼瑯琊與麼告報可謂  
恩大難酬諸人若也未知報恩更爲頌出十方諸佛  
爛木樛十聖三賢茅溷籌無事晚來湖上望白蘋紅  
蓼滿汀洲

寂照忌拈香今朝八月初四日一句明明道不得合  
國人追不再來千古萬古空相憶徑塢雲深西湖水  
碧葵蒼松古柏作梅檀牛首之香擷蘊藻蘋蘩爲酥



醍醐之食聊旌遠諱斯臨倍覺感懷疇昔非關義  
重恩深只貴眼橫鼻直一度秋風一度愁地久天長  
有何極

請昌國吉祥亭子元克首座上堂臨濟建立黃檗宗  
旨普化盡力成禱無端仰山道此人有頭無尾有始  
無終山僧昔年承乏海山子元橫身輔佐茲者備員  
宕寺又荷分座說法却不似仰山道此人有頭無尾  
有始無終也諦觀佛祖各各出興隨方化導莫不全  
賓全主全主全賓大用齊彰大機普應流通正法眼  
藏顯示涅槃妙心直得雲行雨施水到渠成還他過

量人堪任過量事卓拄杖云龍得水時添意氣虎逢

山色長威憚

開鑪上堂火鑪頭話無賓主無主無賓話亦無潦倒  
丹霞燒木佛却教院主墮着須

赴徑山退院上堂備員南宕恰三年又向凌霄闡化  
權了却先師舊公案飢來喫飯困來眠且先卸公案  
作麼生了拍禪床下座

於廟主了時雖未不重  
於山巖開土堂  
法登山巖開土堂  
丹竈敷木粉  
開龕土堂火  
山谷是風

愚菴及禪師語錄卷之四

門人 希顏 編次

徑山興聖萬壽禪寺語錄

師於至正辛丑十月十七日承奉行宣政院官疏請  
入寺指山門云天下徑山天下龍門吐吞日月函蓋  
乾坤

佛殿顧左右云插一莖艸建瓊樓玉殿拈一莖艸作  
丈六金身上有鯉魚井底有埵塵

陞座祝贊問答罷乃云通上徹下迴絕羅籠匝地普  
天了無朕跡識不可識智莫能知一自拈花微笑面

撰述  
壁安心便見五葉流芳千燈續焰體究將來摠是強  
生節目直饒上無板仰下絕已躬常光見前壁立萬  
仞何異癩馬繫枯椿黑牛臥死水借使斬新月逸  
格風規冰稜上度過九阨劍刃上拾得全身正好朝  
打三千暮打八百豈不見雲門大師道盡乾坤大地  
無纖毫過患猶是轉句不見一色始是半提須知更  
有全提時節雖然一向與麼去法堂上何啻艸深一  
丈官不容針私通車馬五峰突兀雙徑回環大覺國  
師願力宏深孚佑龍王淨緣際會維禪林之首刹實  
天下之名山不妨與諸人高掛鉢囊拘折拄杖直得

八方寧謐萬姓歌謠鴉鳴鵲噪揔契真源風動塵飛  
皆明佛事揚不揚之正化報不報之深恩正與麼時  
且開堂祝聖一句如何舉似擊拂子黎元頓息三災  
劫睿算延洪億萬春

復舉僧問當山誣禪師掩息如灰時如何誣云猶是  
時人功幹僧云幹後如何誣云畊人田不種僧云畢  
竟如何誣云禾熟不臨場師云誣禪師與麼答話勞  
而無功這僧若是箇漢决不依他作解後來應菴和  
尚道風閣香沈雪巢夜冷半窻明月和氣藹然正與  
麼時且道歸宗與徑山還有相見分也無喝直饒相

見也是蝦蟆窟裏作活計要見四方八面逸格變通別著箇眼始得新徑山莫有長處麼拍禪床云敲出鳳凰五色髓擊碎驪龍明珠千古華山山脚下只應潘閬倒騎驢久立珍重

上堂舉睦州道捏聚也在我裂開也在我有僧便問如何是裂開州云菩提涅槃真如解脫三九二十七卽心卽佛我且與麼道你又作麼生僧云某甲不與麼道州云箴子撲落地榅子成七片僧云如何是捏聚州乃斂手而坐師云大小睦州擬將織蒲鞋手籠罩古今自謂捏聚放開乾坤把斷要且無合殺者僧

當時若是皮下有血見它與麼道但低聲向它耳邊下一轉語教他捏聚也不得放開也不得

瑞浴主火堅固法身膿滴滴地火不能燒水不能洗擲火云我見燈明佛本光瑞如此

上堂僧問不起一念時如何師云道者合如是進云與麼則依而行之也師云虛生浪死漢又僧問父母非我親誰是最親者師云識得不爲寃進云諸佛非我道誰是最道者師云闍黎合自知僧擬議師便喝乃云今朝又是十一月卷地北風吹感發臘月三十便到來勸君各要知時節人漸老水長流君子可八

知得便休

上堂拈拄杖冬至一陽生拄杖長丈二石笋暗抽條  
空花生碓紫且衲僧分上成得箇甚麼邊事莫有道  
得底麼有則不妨出來對衆道看若無徑山自道去  
也卓拄杖

上堂僧問臨濟道一句中具三玄一玄中具三要如  
何是一句中具三玄師云萬仞峰頭駕鐵船進云如  
何是一玄中具三要師云眼裏瞳人吹木叫進云如  
何是和尚家風師云吹折門前一株松進云學人不  
問這箇風師云汝問甚麼風進云家風師云我這

大功不豎賞乃舉仰山示衆云汝等諸人各自回光  
返照莫記吾言汝無始劫來背明投暗妄想根深卒  
難頓拔所以假設方便奪汝麤識如將黃葉止啼有  
什麼是處師云盡十方世界是諸人自己盡十方世  
界是諸人本有光明爲我拈針鋒許妄想麤識來看  
喝一喝下座

上堂庚申好日逢元旦四海歌謠樂太平聖德如天  
何以報卓拄杖云萬年松上一枝藤

上堂舉僧問長慶有問有答賓主歷然無問無答時  
如何慶云怕爛却那僧又問睦州州云相逢盡道休

官去林下何曾見一人師云長慶放頑睦州擔版等是有問有答要且未會無問無答底道理在今日忽有問徑山有問有答賓主歷然無問無答時如何只向道一曲自歌山自綠此情不與白雲知

婺源比丘明梁助銀壹兩  
吳江北寺比丘明傳助銀壹兩刻

愚菴及禪師語第四卷  
佛弟子王大穀助寫費

松陵非仲張雋對  
自聞道人蔣成榮刊

長洲金之龍書  
崇禎二年己巳歲佛歡喜日姑蘇兜率園識

愚菴及禪師語錄卷之四

愚菴及禪師語錄卷之五

門人 希顏 編次

再住徑山興聖萬壽禪寺語錄

師至正甲辰二月十九日復住徑山據方丈云釋迦掩室于摩竭癩馬繫枯椿淨名杜口于毗耶黑牛臥死水徑山終不學它古人畢竟如何卓拄杖鉤竿斫盡重栽竹不計工程得便休

院劄拈起劄云前佛性命後佛紀綱摠在這裏凜然如朽索之馭六馬危乎猶一髮之引千鈞若非大承相赤手提持全肩擔荷何處更有今日諸人還委悉

麼車不橫推理無曲斷

陞座祝贊罷有僧出問云龍門岌岌倚天開妙喜今朝喜再來坐斷十方全正令森羅萬象舞三臺正與麼時如何是祝聖一句師豎起拂子云萬歲萬歲萬萬歲進云妙喜道十方世界至人口法界所有卽其舌只憑此口與舌頭祝吾君壽無間歇未審與和尚是同是別師云黃河如帶泰山如礪進云祝聖已聞玄妙語祖師心印若爲論師云山上有鯉魚井底有逢塵進云此是開山國一祖師道底和尚畢竟如何指示師云井底有逢塵山上有鯉魚進云恁麼則今

古應無墜分明在目前師云一任鑽龜打瓦又有僧出問云記得昔日江西馬祖嘗令西堂智藏馳書到當山國一禪師師開緘見一圓相索筆于圓相中點一點意旨如何師云不因閣梨問老僧亦不知進云後來南陽忠國師道欽師猶被馬師惑還端的也無師云也端的也不端的僧禮拜歸衆師乃云山僧隨緣受報濫此承乏坐嬰宿障誓欲投閒茲承監察御史太尉柱國丞相不忘靈山付囑協心削牘復任住持難爲迴避只得免循舊例陞于此座虔焚寶香祝延今上皇帝聖壽萬安皇后齊年太子千秋文武官

班同增祿筭欽願皇圖永固帝道遐昌武偃文脩河  
清海晏風調雨順物阜民康便恁麼散去一期事畢  
寧不盡善盡美更教山僧說箇什麼卽得且山僧雖  
離此山恰恰二年朝夕與諸人看毛廝結行則與諸  
人同行坐則與諸人同坐覓一絲毫隔礙底道理了  
不可得此日歸來依然只是舊時人不改舊時行履  
處所以道往復無際動靜一原去來不以象動靜不  
以心覓一絲毫動靜去來之相了不可得若信得及  
便好各各安家樂業恢張祖父田園吹無孔笛唱太  
平歌驅逐文殊普賢走使觀音勢至於一毫端見寶

王刹坐微塵裏轉大法輪任運優游隨緣自在雖然  
如是若約衲僧分上要且未夢見他汗臭氣在豈不  
見江西馬大師昔日令西堂智藏馳書到當山大覺  
欽禪師大覺開緘見一圓相索筆于圓相中點一點  
可謂龍驤虎驟玉轉珠回好手手中呈好手紅心心  
裏中紅心因甚南陽忠國師却道欽師猶被馬師惑  
後來雪竇道徑山被惑且置若將呈似國師別作箇  
什麼伎倆免被惑去敢謂天下老和尚各具金剛眼  
睛廣作神通變化還免得麼雪竇見處也要諸人共  
知卽這馬師當時畫出早是惑了也且道雪竇與麼



批判還能自免也無山僧今日因齋慶讚舉似諸人以拂子打圓相云莫有不受惑者麼喝一喝

復舉應菴和尚再住歸宗上堂舉南禪師出城還山有頌示衆云去日一溪流水送回時滿谷白雲迎一身去住非去住二物無情似有情應菴道南禪師好則好只是愛便宜歸宗亦有一頌舉似大衆去時冒雨連宵去回時帶水又拖泥自怪一生無定力尋常多被業風吹愚菴今日再住徑山亦有一頌舉似大衆去日應須償宿債回時宿債本來空山上鯉魚打踣跳一國之師展笑容

上堂至道無難惟嫌揀擇如何是佛麻三斤如何是佛靴矢楸庭前柏樹子一夜風吹落

上堂僧問牛頭未見四祖時如何師云深山藏毒虎進云見後如何師云淺艸露羣蛇進云見與未見時如何師云日出東方夜落西僧禮拜師乃云千波競起是文殊家風一亘晴空是普賢床榻春光澹蕩鳥語綿蠻萬壑爭妍千崑竝秀且道是什麼人境界直下會得更須知有人境俱奪向上一路拈拄杖有時卓向千峰頂劃斷飛雲不放高

上堂無漏真淨云何是中更容他物良久云啼得血

流無用處不如緘口過殘春

上堂僧問三世諸佛不知有狸奴白牯却知有未審知有箇甚麼師云師姑元是女人做進云一大藏教是箇切脚還親切也無師云切僧禮拜師乃云今朝五月一天晴日頭出林間梅子紅砌下泉聲急眼裏耳裏絕瀟灑無上菩提從此得教中道若以色見我以音聲求我是人行邪道不能見如來惺惺直須惺惺歷歷直須歷歷拍禪床云莫待當來問彌勒

上堂五月五日端午節潦倒徑山無法說大家喫酸菖蒲茶一般滋味休分別分別則任汝諸人且道畢竟

竟是何滋味良久云人情若好喫水也肥

因事上堂舉古德道忍忍三世如來從此盡饒饒萬禍千殃從此消默默無上菩提從此得慈受深和尚云會得此三種語了好箇不快活漢師云老慈受錯下名言會得此三種語了好箇没量大人還委悉麼堯舜不彰民自化相逢何必動干戈

上堂舉子湖忽一夜於僧堂前叫捉賊大眾皆驚有一僧從堂中出子湖擒住云捉得也捉得也僧云不是某甲湖云是卽是卽是你不肯承當師云子湖好與三十棒何也只解捉賊不解殺賊

撰述  
上堂僧問聲聞見性如夜見月菩薩見性如晝見日  
和尚見性時如何師云黃河九曲水出岷嶓進云直  
指人心見性成佛還端的也無師云問取達磨大師  
僧擬議師云鷓子過新羅乃舉黃檗問百丈從上相  
承底和尚如何指示于人丈據坐檨云後代兒孫將  
何傳受丈云我將謂你是箇漢便歸方丈師云百丈  
便歸方丈則且置且道從上相承底畢竟是箇什麼  
驀拈拄杖卓一下云秋初夏末東去西去南天台北  
五臺走得遍還自知

上堂今朝又是八月一萬壑千巖儼秋色牛帶寒鴉

過別村善財何處尋彌勒

上堂今朝八月十五看取月圓當戶分明無欠無餘  
只恐諸人蹉過不蹉過兩箇拳頭一箇大

上堂舉白雲示衆云金蕊叢叢帶露新采采烹茗賞  
佳辰浮杯何必須宜酒但有清香自醉人開福道白  
雲老人大似巧媳婦做出無麩餠飪惜乎知味者少  
開福效顰亦有一偈重陽黃菊未成花落帽無勞憶  
孟嘉但得青山長在眼不妨流水去無涯師云白雲  
開福大似徐六擔板各見一邊徑山見處也要諸人  
共知時移節換是尋常過了重陽又一陽人事自生

今日意黃花只作去年香

一日新到僧叅師問汝名甚麼僧云智通師云一切智通無障礙汝爲甚麼頭頭築著處處繫絆僧云某甲叅方遇夏過夏逢冬過冬今日特來禮拜和尚並無繫絆師云汝因甚騰蛇纏足僧看脚下師云又道無繫絆便打

師又問僧汝名甚麼僧云慧徹師云年多少僧云四十師云四十而不惑汝還徹也未僧云某甲特來求和尚指迷師云眉在眼上僧擬議師亦打

衍書記赴普慶上堂僧問釋尊出世爲一大事因緣

今日書記出世和尚陞座舉揚畢竟爲箇甚麼師云今古應無墜分明在目前進云與麼則古釋迦不先今彌勒不後師云一任卜度進云三聖道我逢人則出出則不爲人興化道我逢人則不出出則便爲人且道是同是別師云一對無孔鐵鎚進云真淨和尚道這兩箇老古錐竊得臨濟些子活計各自分疆列界氣衝宇宙又且如何師云關西子沒頭腦進云龍門無宿客龜鶴自成仙師云又被風吹別調中乃云欲識佛性義當觀時節因緣豈不見馬祖問藥山于近日見處作麼生山云皮膚脫落盡唯有一真實祖

云子之所得可謂協于心體布于四肢旣然如是將三條篋束取肚皮隨處住山去山云某甲又是何人敢言住山祖云不然未有長行而不住未有常住而不行欲益無所益欲爲無所爲宜作舟航無久住此馬簸箕固是鰕爲子屈然則時節旣至其理自彰正與麼時且如何說箇自彰底理驀拈拄杖召大衆云來日普慶山中看取斯道長老爲一切人分明舉似卓拄杖喝一喝

上堂舉安國問僧云得之于心伊蘭作梅檀之樹失之于旨甘露乃蒺藜之圍我要箇語具得失兩意僧豎起拳云不可喚作拳頭國云只爲喚作拳頭雪竇云無繩自縛漢拳頭也不識師云得又得箇什麼失又失箇什麼直饒得失兩忘未免無繩自縛更說什麼一語兩意遂豎起拳云一拳拳倒黃鶴樓一踢踢翻鸚鵡洲有意氣時添意氣不風流處也風流

上堂舉僧問六祖黃梅衣鉢什麼人得祖云會佛法人得僧云和尚還得麼祖云我不得僧云和尚因甚麼不得祖云我不會佛法大慧和尚拈云大衆還見祖師面目麼若也不見山僧爲你指出乃云蕉芭蕉芭有葉無丫忽然一陣秋風起恰似東京大相國寺

三十六院東廊下壁角頭王和尚破袈裟畢竟如何  
歸堂喫茶師云妙喜恁麼提持正是錯認驢鞍橋作  
阿爺下頷誤他後代兒孫隨例喚鐘作甕諸人要見  
祖師面目麼描也描不成畫也畫不就葉落歸根來  
時無口

上堂今朝十月初一門外寒風凜凜待歸煖處商量  
何似當陽拈出驀拈拄杖云火鑪闊一尺古鏡闊一  
尺三世諸佛出不得六代祖師出不得天下老和尚  
出不得

達磨忌拈香萬里西來九年面壁前無釋迦後無彌

勒單單遺下履一隻等閒賣弄價重連城奇特商量  
分文不直一番拈起一番新千古令人轉相憶呈香  
云休相憶今朝十月初五日

上堂僧問如何是佛法大意師云開口見膽僧禮拜  
師便下座

上堂今朝十一月十四打鼓陞堂賀冬至南山雲起  
北山雲張公喫酒李公醉若論佛法兩字謝三娘賣  
銀

上堂異法有故異法出生異法無故異法滅盡不教  
仁者取一法如微塵大不教仁者捨一法如毫髮許

諸人每日上來下去也只是被些子聲色惑亂身心不安若是聲色名字不是佛法又疑伊作麼喝一喝上堂心是根法是塵兩種猶如鏡上痕痕垢盡時光始見心法雙忘性卽真永嘉大師雖負曹谿正傳若到徑山門下直須棒了連夜趕出何故諸方聞得將謂徑山與人說心說性

臘八上堂曠大劫來成正覺無端錯認定盤星徑山不是揚家醜只恐諸人昧己靈

上堂舉白雲端和尚示衆云此事如萬仞崖頭揔知道放著手脚便一撲到底只是捨命不得山僧不動毫頭教諸人到底去乃擲下拄杖師驀拈拄杖擲下召大衆云還得到底麼登山須到頂入海須到底登山不到頂不知太虛之寬廣入海不到底不知滄溟之淺深喝一喝才有是非紛然失心

上堂元正啓祚萬物咸新井底蓬塵蔽日山上鯉魚拏雲且不涉時緣一句作麼生道拈拄杖云拄杖今朝添一歲拈來依舊黑鄰皴

上堂十五日已前春雨如膏十五日已後春光似箭正當十五日管絃沸月宣和氣燈火燒空奪夜寒拈燈籠來佛殿裏將山門安燈籠上一切智智清淨無

二無二分無別無斷故驀拈拄杖云三歲孩兒抱花  
鼓莫來攔我毬門路

上堂一切無涅槃無有涅槃佛無有佛涅槃遠離覺  
所覺覺所覺空空所空滅寂滅見前眼中添屑既是  
寂滅見前爲甚麼却眼中添屑咄咄無物堪比倫  
教我如何說

上堂僧問既是一真法界爲甚麼却有萬別千差師  
云甜瓜徹蒂甜苦瓠連根苦進云祖師道卽心卽佛  
又道非心非佛學人如何趣向師云擬向卽乖乃舉  
圓悟與佛燈過溪次驀將佛燈推向水中便問牛頭

未見四祖時如何燈云潭深魚聚又問見後如何燈  
云樹高招風又問見與未見時如何燈云伸脚原在  
縮脚裏師云同行須好伴還他佛燈圓悟雖然山僧  
當時若見揔推向死水裏浸却何故老老大大過溪  
也不依本分

上堂舉僧問虎丘隆禪師九旬禁足意旨如何隆云  
理長則就師云九夏安居就理長徑山無法可論量  
桑疇雨過羅紈膩麥隴風來餅餌香

上堂舉金峰和尚示衆云山僧二十年前有老婆心  
二十年後無老婆心有僧便問如何是二十年前有



老婆心峰云問凡答凡問聖答聖如何是二十年後無老婆心峰云問凡不答凡問聖不答聖師云路遙知馬力歲久見人心還見金峰立地處麼截斷生死根林超出聖凡途轍萬古乾坤一朝風月

顏藏主赴千頃上堂舉古德道者一片田地分付來多時也我立地待你構去法眼道者一片田地分付來多時也我坐地待你構去佛果道這一片田地分付來多時也我今爲汝當面慶讚一卽三三卽一所以不同互有得失徑山道這一片田地分付來多時也自是你構不著今日分付用愚長老赤手提持袒

肩擔荷向千頃雲中放兩拋三深畊淺種栽荆棘林開三毒花結無明果改禾莖爲粟柄變瓦礫作黃金直得釋迦彌勒拍手喜歡文殊普賢合掌贊歎遵從百代典刑振起一方叢席卓拄杖云要識真金火裏看棒頭有眼明如日

上堂舉翠岩示衆云一夏與兄弟東語西話看翠岩眉毛在麼用盡自己心咲破他人口保福云作賊人心虛是精識精是賊識賊長慶云關一字入公門九牛拽不出這一隊漢朝打三千幕打八百有什麼罪過只如洞山道秋初夏末東去西去直須向萬里無

寸草處去石霜云出門便是草諸人作麼商量若也不會徑山直爲頌出萬里無寸草出門便是草大盡三十日小盡二十九下座

上堂諸方今日開爐未免與諸人說些火鑪頭話以拂子作吹火勢云喚作火燒殺你不喚作火凍殺你上堂四大本空佛依何住青青翠竹盡是法身若悟無依佛亦無得鬱鬱黃花無非般若諸人信也好不信也好三千里外遇著本色道流輒不得道徑山從來柳下惠

上堂僧問如何是不遷義師云日出東方夜落西進

云如何是不壞身師云昨日生今日死進云如何領會師云不快漆桶乃舉五祖和尚云有一物不屬凡不屬聖不屬邪不屬正萬事臨時自然號令師云家無白澤之圖豈有如是妖怪

上堂舉麻谷持錫到章敬繞禪床一匝振錫一下卓然而立敬云是是又持錫到南泉繞禪床一匝振錫一下卓然而立泉云不是不是谷云章敬道是和尙爲甚麼道不是泉云章敬是是汝不是此是風力所轉終成敗壞師云百鳥不來春又過不知誰是住菴

人

上堂冬至前後砂飛石走艸木叢林作師子吼羣陰  
剝盡一氣潛回一亦莫守萬法無咎驀拈拄杖云拄  
杖子吞却山河大地置而不問且道馬大師自從胡  
亂後因甚三十年不少鹽醬卓拄杖云金輪天子同  
草店家風別

上堂迦葉糞掃衣價直百千萬輪王髻中寶不直半  
分文常州草蟲一百文買一幅蘇州城裏泥孩兒三  
文錢買一對有利無利不離行市猫兒偏解捉老鼠  
上堂僧問達磨未來時如何師云眼在鼻上進云來  
後如何師云脚在肚下問如何是學人自己師云脚

板大如手掌進云如何是衲僧行脚事師云緊峭草  
鞋乃舉雲門問疎山如何是法身邊事山云枯椿又  
問如何是法身向上事山云非枯椿門云還許學人  
說道理也無山云許門云枯椿豈不是明法身邊事  
山云是門云非枯椿豈不是明法身向上事山云是  
門云法身還該一切否山云爭得不該門指淨瓶云  
法身還該這箇麼山云閣梨莫向淨瓶邊會門便禮  
拜師云二員尊宿一問一答一挨一拶如珠走盤縱  
橫無礙可謂善說法要雖然要且只說得法身邊事  
諸人要會法身向上事切忌向語脉裏轉却何也一

兔橫身當古路蒼鷹纔見便生擒後來獵犬無靈性  
空向枯椿舊處尋

上堂今朝五月端午節徑山爲汝開真訣赤口白舌  
盡消除百怪千妖俱殄滅黃鸝上樹一枝華白鷺下  
田千點雪叅玄流善甄別觀音菩薩將錢買胡餅放  
下手却是一塊生鐵擊拂子下座

上堂生佛已前有一段奇特因緣大家會取好便下  
座

上堂僧問德山入門便棒時如何師云寰中天子勅  
進云臨濟入門便喝時如何師云塞外將軍令進云

一人行棒一人行喝搥道是發大機顯大用還有優  
劣也無師云今日熱如昨日僧云謝師答話師乃云  
今朝六月初一諸處栽田已畢炎炎火日當空大野  
流金鑠石衲僧搖扇取涼不費纖毫氣力不費力萬  
兩黃金亦消得

青苗上堂僧問藥山尋常不許人看經意旨如何師  
云常轉如是經百千萬億卷進云山一日看經次有  
問和尚不許人看經因甚却自看山云我只要遮眼  
又且如何師云汝若看牛皮也須穿進云和尚今日  
普請看經畢竟功歸何所師云汗邪滿車甌窶滿篋

乃舉教中道如來所演八萬四千法藏言教皆名爲  
文離一切言音文字理不可說是名爲義又云若諸  
經中文句廣博能令衆生心意踴躍名不了義若能  
宣說文句及心皆同灰燼是名了義山中今日滿散  
青苗勝會見前大衆一七日中披宣大藏依了義經  
不依不了義經一句一偈一字一義莫不格於天地  
感于神明悉使見聞心意踴躍且如何說箇文句及  
心皆同灰燼底道理雲門大師道直得觸目無礙祇  
得名身身身山河大地是名名亦不可得喚作三昧  
性海俱備猶是無風匝匝之波直得忘知于覺覺卽

佛性喚作無事人更須知有向上一竅在且作麼生  
是向上一竅拈拄杖汗邪滿車甌窶滿篝喝一喝下  
座

因監寺入塔因妄有生因生有滅寂滅見前觸體眼  
活菡萏花開栗棘蓬無縫塔中雲句匣

上堂舉保寧勇和尚示衆云祖師門下絕人行深險  
過于萬仞坑垂手不能空費力任教堂上綠苔生師  
云見義不爲何勇之有

寂照忌拈香巴陵酬雲門之恩只憑三轉語儉生不  
孝楊岐爲慈明設齋特作女人拜義出豐年徑山今

日先師忌辰直是無可施設茗椀熏爐聊伸供養庶  
表不忘諸人且道不忘箇什麼便燒香

善權通長老嗣書至上堂自從胡亂後三十年不少  
鹽醬雪後始知松柏操任汝非心非佛我只管卽心  
卽佛事難方見丈夫心有底便道江西信息通也大  
梅梅子熟也善權方便固當如是只如石頭道書亦  
不達信亦不通諸人如何話會直下道得鋤斧子未  
到你在

圓悟大慧祖師同忌拈香隻手不獨拍單絲不成線  
兩箇五百文鬪湊合一貫雞啼白晝認頻呼小玉搥  
墮聲塵薰風南來證諸佛法身何曾夢見橫說豎說  
熾然說卷百億香水海千廣長舌本波瀾內空外空  
畢竟空攝有漏微塵國于事事無礙法界臭皮鞮炙  
地熏天折竹篔簹鉤雷掣電擲瞎臨濟正法眼搥碎東  
山鐵酸餡陵滅宗風五逆孫終不隨他脚跟轉香爇  
一鑪茶傾三奠醮子撲落地碟子成七片

上堂一二三四五六七地水火風空覺識拈來數目  
甚分明明眼衲僧數不出數得出也大奇烏龜鑽敗  
壁雞向五更啼

十月旦上堂當鑑不避火逆當言不避截舌騎驢入

尔鼻孔裏牽牛入尔眼睛中作麼生商量若道不得  
老僧代諸人下一轉語擲拄杖下座

一提點入塔一人發真歸元十方虚空消殞寶塔從  
地湧出正是平地骨堆撫骨云無人知此意令我憶  
楊岐

元宵請藏主典座上堂佛法無人說雖慧莫能了譬  
如暗中寶無燈不能見僧問睦州一氣還轉得一大  
藏教也無州云有甚饅饅飽子快下將來是你諸人  
作麼生了作麼生見驀拈拄杖云百般制造由人到  
底無過是麵卓拄杖喝一喝

上堂離言說相離文字相離心緣相畢竟如何迦葉  
擎拳阿難合掌

上堂僧問不是心不是佛不是物是箇甚麼師云天  
人羣生類皆承此恩力進云謝和尚指示師云莫謗  
老僧好僧禮拜師乃拈拄杖云三世諸佛亦如是西  
天二十八祖亦如是東土六祖亦如是天下老和尚  
亦如是左邊卓云如是則易不如是則難右邊卓云  
如是則難不如是則易中間卓云也不難也不易靠  
拄杖云放在臥床頭急要打老鼠

請兩序上堂獨樹不成林兩手鳴擗擗老大小叢林

各要知時節主事輔弼山門頭首贊揚佛法十方高人聚會究取當頭一著長老坐致太平手裏把箇木杓葛拈拄杖云諸人從朝至暮啾啾唧唧說黃道黑摠在杓頭裏七出八沒且道杓柄長多少卓拄杖喝

一喝

上堂葵花隨日轉芭蕉聞雷抽苔提煩惱循業發見劃拄杖云分開碧落松千丈截斷紅塵水一溪

行重建行春橋師召衆云大橋雄跨石湖濱捨舊圖新喜落成萬國車書通遠道三吳城郭展脩程溪山出色增佳勝簫鼓行春樂太平不動腳頭登彼岸十

方一路要分明好諸仁者還他力量人辦此奇特事功夫妙密機用縱橫易深險成坦途架虛空爲平地高高處觀之不足低低處仰之有餘可以津濟四生可以梯航九有直得輝騰佛日慶衍

皇圖牧謳樵唱共履康莊馬載驢駝咸臻實際正與麼時且平步丹霄高超物表一句作麼生道遂驟步云塵塵剎剎無留礙直踏毗盧頂上行

愚菴及禪師語錄卷之五



普陀山比丘照恩助銀壹兩

開溪愚菴及禪師語錄第五卷

佛鑑子王大穀助寫費  
長金之龍書  
目聞道人蔣成榮刊  
崇禎二年己巳歲佛歡喜日姑蘇兜率園識



